



Cuant che o rivavi li dal cimiteri o pedalavi plui svelt. Par sghindâ chê vôs che o sintivi di un pôcs di dîs: - Sta a cjase!

Ma nuie ce fâ, e tornave ogni dì e ogni dì plui fuarte, e sclopave fûr des tombis: - Sta a cjase!

Fin che une dì no ti le viodio devant!

Viodi une vôs?! Ma ce dîstu? Une vôs si le sint, no si le viôt!

E pûr veh!

Vele là!

- Ti ai dit di stâ a cjase! Parcè no vuelistu capîle?

Une vôs triste, e ven fûr di une sorte di bocje plene di muart.

- Ma ce aio di stâ a fâ a cjase?

- Iih, tu cjatis ben alc ce fâ! Simpri tu vais che no tu âs timp di scrivi, e scrîf, no, alore! Une conte, une conte curte.

- Oh no! Vonde scrivi! O cjapi sù la bici jo e...

- Sta a cjase! Capissistu nuie? Tu, parcè che tu âs dos mans, tu crodis di sedi cuissà ce!

Viodistu? Jo o ai mêl mans. No son bielîs come lis tôs, ma se ti tocji...

- No sta tocjâmi! Puare mai te, se tu mi tocjis!

- Ti ai za tocjât! No sintistu un fûc intal zerneli? Un trop des mês mans intal cuel? Dibant gratâlis vie, a son par dentri! E chel savalon intai voi? A son i miei regâi! Ti vevi ben dit di stâ a cjase!

Intal jet o çavariavi.

- E je une vôs! E je taronde! E à mil mans. E je fate di aiar, e je fate di nuie, ti beche, ti fas kiiiik, mandaitle vie, 'sta a cjase' mi dîs, ma jo no soio a cjase mê?! Dulà soio? Ce bestie ise chê lì? Une vacje? Ma... soio inte stale? Ce fasio inte stale? Chê vôs vignude fûr dal cimiteri e cjamine cui scarabais, cui sgripions, cu lis pantianis, no, no cjamine, e svolè, ti beche, o ai sêt, o ai stranfada la aghe, brocolat di un, ma no je aghe, no isal sanc!?

O çavariavi.

- E chê robe culî, ce ise cumò? Chê robe culî che mi sbavacje su la muse, ce robe ise?

- O soi jo.

- Cui, jo?

- O soi la vacje.

- Cui? La vacje? Alore pardabon o soi inte stale! Ce vuelistu vê, vacje?

- Se tu scrivis cheste famose conte, jo ti le mangj vie la vôs triste che e je daûr a dâti daûr.

- Ma...

- Dai! Scrîf!

E cussì o ai scrit. No je vignude cuissà ce. Ma ce pretesis! Provait vualtris a scrivi culis mans e la muse smaltacadis de sbavacje di vacje!

di Laurin Zuan Nardin

#1138

Conte vincidore dal Pôrecurte Day 2021

